

狄道州志卷十五

紀事

狄道僅一州耳而為用武之國載在史冊者班班可考也
今按年臚列之至唐寶應以後臨州沒於吐蕃故李吉甫
撰元和郡國志獨於臨闕焉不詳迨今千餘年又烏從而
述之考古者鑒諸

周

襄王二十九年秦用由余謀伐戎益國十二開地千里史記正
義曰并國十四隴西北地郡是也通鑑前編

安王十八年秦獻公初政欲復穆公之迹兵臨渭首滅狄獯戎

狄道州志

卷十五 紀事

一

後漢書西羌傳

按秦穆公時十二國皆服從至獻公始滅狄獯二

戎於是邑狄道獯道故誌之

漢

惠帝六年春匈奴寇狄道

舊府志

七年十二月復來寇

全上

孝文帝十一年夏匈奴寇狄道

全上

景帝三年研種留何率種人求守隴西塞於是徙留何等於狄

道安故至臨洮氏道羌道縣

後漢書西羌無戈爰劍傳

武帝元狩三年春以霍去病為驃騎將軍將萬騎出隴右有功

滅隴西北地上郡戎卒之半

漢書霍去病傳

元鼎元年遣李息擊破先零羌於狄道府志

元帝初元二年秋隴西羌三姐旁種反遣馮奉世擊之典屬國

任立屯白石護軍都尉韓昌為前軍屯臨洮奉世為中軍屯

首陽西極山上擊破降之見漢書馮奉世傳及西羌傳

成帝元延元年六月迷唐寇隴西遣將軍劉尚討破之府志

淮陽更始元年成紀隗囂起兵應漢隴西金城諸郡皆下滇良

者燒當之元孫也更始赤眉之際寇金城隴西後漢書西羌傳

光武帝建武五年遣來歙送馬援歸隴右府志

十年先零豪與諸種相結復寇金城隴西來歙率諸將擊羌於

五谿大破之斬首數千級於是開倉賑之隴右遂安後漢書西羌傳

狄道州志

卷十五 紀事

十一年夏先零種復寇臨洮隴西太守馬援大破降之後悉歸

服徙置天水隴西扶風三郡後漢書西羌傳

中元元年九月燒當羌寇隴西敗郡兵於允街赦隴西囚徒減

罪一等勿收今年租調遣謁者張鴻討叛羌於允吾鴻軍大

敗戰没十一月遣中郎將竇固監捕虜將軍馬武等二將軍

討燒當羌後漢書明帝本紀

明帝永平元年遣中郎將竇固捕虜將軍馬武等擊滇吾於西

邯大破之滇吾遠引去餘悉散降徙七千口置三輔以謁者

竇林領護羌校尉居狄道林為諸羌所信而滇岸遂詣林降

林為下吏所欺謬奏上滇岸以為大豪承制封為歸義侯加

號漢大都尉明年慎吾復降林復奏其第一豪與俱詣闕獻見帝怪一種兩豪疑其非實以事詰林林辭窘乃僞對曰滇岸卽滇吾隴西語不正耳帝窮驗知之怒而免林官會涼州刺史又奏林贓罪遂下獄死謁者郭襄代領校尉事到隴西聞涼州羗盛還詣闕抵罪於是復省校尉官後漢書西羗傳七月捕虜將軍馬武等與燒當羗戰大破之募士卒戍隴右賜錢人三萬後漢書明帝本紀章帝建初三年臨羗迷吾與布橋等五萬餘人共寇隴西遣車騎將軍馬防長水校尉耿恭副擊破之於是臨洮索西迷吾等悉降防乃築索西城徙隴西南部都尉戍之悉復諸亭候

狄道州志

卷十五 紀事

三

後漢書

元和三年秋燒當羗號吾入寇隴西界郡督烽掾李章追之生得號吾將詣郡號吾曰獨殺我無損於羗誠得生歸必悉罷兵不復犯塞隴西太守張紆放遣之羗卽解散後漢書西羗傳

章和元年護羗校尉傅育請發隴西等郡各五千人諸郡太守將之育自領金城漢陽五千人合二萬兵共擊迷吾令西隴兵據河南諸郡兵未及會育軍獨進至建威南三兜谷不設備迷吾伏兵三百夜突育營衆驚走育下馬手殺十餘人而死及諸郡兵到羗遂引去後漢書

二年以鄧訓爲護羗校尉擊迷唐破之舊府志

和帝永元二年十一月隴西羌反詔丞相元成等人議是時比歲不登朝廷以爲憂右將軍馮奉世上言願將兵擊之於是遣奉世到隴西且上地形部衆多少之計願益兵上爲發六萬餘人是月大破羌戎斬首數千級皆走出塞詔罷吏士頗留屯田備要處賜奉世爵關內侯

後漢書

九年秋迷唐率八千人寇隴西殺數百人乘勝深入脅塞內諸種羌共爲寇盜衆羌復悉與相應合步騎三萬人擊破隴西兵殺大夏長遣行征西將軍劉尚越騎校尉趙代副將北軍五營黎陽雍營三輔積射及邊兵羌胡三萬人討之尚屯狄道代屯枹罕尚遣司馬寇吁監諸郡兵四面並會迷唐懼棄

狄道州志

卷十五

紀事

四

老弱奔入臨洮南尚等追至高山迷唐窮迫率其精强大戰計斬虜千餘人得牛馬羊萬餘頭迷唐引去漢兵死傷亦多不能復追乃還入塞明年尚代並坐畏懦徵下獄免謁者王信領尚營屯枹罕謁者耿譚領代營屯白石譚乃設購賞諸種乃來內附迷唐恐乃請降代譚遂受降罷兵遣迷唐詣關其餘衆人不滿二千饑窘不立入居金城

後漢書西羌傳

十三年秋迷唐復將兵向塞校尉周鮪與金城太守侯霸及諸郡兵屬國湟中月氏諸胡隴西牢姐羌合三萬人出塞至允川與迷唐戰周鮪還營自守惟侯霸兵陷陣斬首四百餘級羌衆折傷種人瓦解降者六千餘口分徙漢陽安定隴西迷

唐遂弱其種衆不滿千人遠踰賜支河首依發羗居

後漢書西羗傳

安帝永初元年夏遣騎都尉王宏發金城隴西漢陽羗數百千

騎征西城宏迫促發遣群羗懼遠屯不還行到酒泉多有散

叛諸郡各發兵邀遮或覆其廬落於是勒姐當煎大豪東岸

等愈驚遂同時奔潰麻奴兄弟因此遂與種人俱西出塞先

零別種與滇零諸羗種大爲寇掠斷隴道

後漢書西羗傳

二年滇零等自稱天子於北地招集武都參狼上郡西河諸雜

種衆遂大盛東犯趙魏南入益州殺漢中太守董炳遂寇鈔

三輔斷隴道湟中諸縣粟石萬錢百姓死亡不可勝數朝廷

不能制而轉運難劇詔鄧隲還師留任尙屯漢陽爲諸軍節

狄道州志

卷十五 紀事

五

度 後漢書西羗傳

三年春復遣騎都尉任仁督諸郡屯兵收三輔仁戰每不利衆

羗乘勝漢兵數挫當煎勒姐種攻沒破羗縣種羗又沒臨洮

縣生得隴西南部都尉

後漢書西羗傳

四年秋七月任尙擊先零羗狼莫大破之西河虔人種羗降隴

右平

舊志府

五年三月任尙坐無功免羗遂入寇於是詔隴西徙襄武

後漢書西

羗傳

元初元年冬十月戊子先零羗敗涼州勅史皮陽於狄道死者

八百餘人

後漢書西羗傳

二年西羌寇隴西後漢書西羌傳

延光三年秋隴西郡始還狄道焉後漢書西羌傳

九月乙巳詔郡國中都官死辜擊囚減罪一等詔敦煌隴西及度遼營其右趾以下及亡命者贖各有差後漢書安帝紀

順帝永建元年隴西種羌反校尉馬賢將七千餘人擊之戰於臨洮斬首千餘級皆率種人降進封賢都鄉侯後漢書西羌傳

四年令安定北地上郡及隴西金城當儲穀粟令周數年馬賢以犀苦兄弟數背叛因繫質於令居後漢書西羌傳

陽嘉三年種羌良封等復寇隴西漢陽詔拜前校尉馬賢為謁者鎮撫諸種馬續遣兵擊良封斬首數百級後漢書西羌傳

狄道州志

卷十五紀事

六

四年馬賢亦發隴西吏士及羌胡兵擊殺良封斬首千八百級

獲馬牛羊五萬餘頭良封親屬並詣賢降後漢書西羌傳

永和六年春東西羌大合鞏唐種三千餘騎寇隴西西羌傳

桓帝延熹二年以中郎將段熲為校尉時燒當羌八種寇隴右

熲擊大破之後漢書西羌傳

五年烏吾種復寇漢陽隴西金城諸郡兵共擊破之各還降附

後漢書西羌傳

延熹中皇甫規為中郎將持節破零吾降諸羌時隴右獲安三

國志

後帝建興六年魏郭淮領雍州刺史太和二年破隴西名羌唐

躡於枹罕五年蜀出鹵城是時隴右無穀議欲關中大運淮以威恩撫循羌胡家使出穀平其輸調軍食用足

魏志郭淮傳

延熙三年魏正始元年蜀將姜維出隴西淮遂進軍追至彊中

維退遂討羌迷當等按撫柔氏三千餘落拔徙以實關中

魏志

郭淮傳

十年衛將軍姜維出隴西魏正始八年隴西南安金城西平諸羌餓何燒戈伐同蛾遮塞等相結叛亂攻圍城邑南招蜀兵涼州名胡治無戴復叛應之討蜀護軍夏侯霸督諸軍屯爲翅淮軍始到狄道議者僉謂宜先討定枹罕內平惡羌外折賊謀淮策維必來攻霸遂入風中轉南迎霸維果攻爲翅會

狄道州志

卷十五 紀事

七

淮軍適至維遁退進討叛羌斬餓何燒戈降服者萬餘落

魏志

郭淮傳

六年夏四月姜維伐魏圍狄道

通鑑

十七年夏六月姜維率衆出隴西冬拔狄道河間臨洮三縣民

居於綿竹繁縣

三國志

又按志是年魏狄道長李簡密書請

降衛將軍姜維率張嶷等因簡之資以出隴西旣到狄道簡

悉帥城中吏民出迎軍軍前與魏將徐質交鋒嶷臨陣隕身

意卽是事也

十八年八月姜維復議出軍遂將數萬人至枹罕魏雍州刺史王經與戰於洮西大敗死者萬計還保狄道維遂圍狄道魏

詔鄧艾行安西將軍與征西將軍陳泰并力拒維泰進軍隴西諸將皆曰王經新敗蜀衆太盛今以烏合之卒當之殆必不可不如據險自保觀釁待敝此計之得也泰曰維輕兵深入正欲與我爭鋒原野求一戰之利當高壁深壘挫其銳氣今乃與戰使賊得計經既破走維若以戰克之威進兵東向據略陽積穀之實招納羌胡東爭關隴傳檄四郡此我之所惡也今乃以乘勝之兵挫峻城之下攻守勢殊客主不同吾乘高據勢臨其項領不戰必走矣遂進軍潛行夜至狄道東南高山上多舉烽火鳴鼓角維不意救兵卒至急攻不克乃

遁而還

通鑑

狄道州志

卷十五

紀事

八

景耀五年冬十月姜維將出軍車騎將軍廖化曰兵不戢必自焚伯約之謂也智不出敵而力少於寇用之無厭何以自存維遂伐魏攻洮陽鄧艾與戰於侯和破之

通鑑

晉

元帝建武元年張寶遣兵赴愍帝之難時焦崧陳安舉兵寇隴右東與劉曜相持秦雍之人死者十八九

晉書張軌傳

成帝咸和二年張駿遣武威太守竇濤金城太守張閏武興太守辛巖等帥衆東會將軍韓璞攻討秦州諸郡劉曜遣其將劉允來距屯於狄道城韓璞進渡沃干嶺後戰於臨洮大敗

駿遂失河南之地

全上

五年張駿因劉曜之亡復收河南地至於狄道置武衛石門侯

和強川甘松五屯護軍與石勒分境

前涼錄

康帝建元元年石虎遣甯遠將軍劉寧攻武都狄道陷之

後趙錄

穆帝永和三年石虎建武十三年夏四月石虎遣涼州刺史麻

秋等伐張重華以中書監石寧爲征西將軍率司並州兵二

萬餘人爲秋後繼劉寧王擢進攻始興武街重華使將軍牛

旋揚康等來禦與寧戰於沙阜寧等敗績引還金城

後趙錄

永樂二年張重華遣使奉章於石虎未幾虎遣將軍王擢襲武

街執護軍曹權胡宣等徙七千餘戶於雍州

前涼錄

帝奕太和二年三月張天錫帥諸軍攻隴西李儼使別駕楊遙

狄道州志

卷十五 紀事

九

爲監前鋒軍事前軍向金城晉興相常據爲使持節征東將

軍向左南游擊將軍張統向白土天錫自將三萬人次倉松

夏四月天錫進攻儼大夏武始二郡皆下之常據敗儼兵於

葵谷天錫進屯左南儼懼退守枹罕遣其兄子純謝罪於秦

且請救於秦秦遣王猛及楊安王撫邵羌等帥步騎二萬救

儼猛使邵羌追斂岐王撫守侯和姜衡守白石猛與楊安救

枹罕天錫遣楊遙逆戰於枹罕東遙大敗殺士卒七千餘級

猛遂與天錫相持於城下因遣天錫書曰吾受詔救儼不令

與涼州戰今當深壁高壘以聽後詔曠日持久恐二家俱弊

非良策也若將軍退舍吾執儼而東將軍徙民西旋不亦可

乎天錫謂諸將曰猛書如此吾本來討叛不來與秦戰遂引

兵歸前涼錄

孝武帝太元八年十一月秦王堅入寇乞伏步頽間秦師敗率

隴西叛之秦使乞伏國仁討之國仁遂與步頽合衆至十萬

據隴右通鑑

十年九月乞伏國仁稱單于置將相分其地置十二郡築勇士

城而都之秦封爲苑川王是爲西秦綱目

十一年枹罕諸氏廢河州刺史衛平立狄道長符登爲雍河二

州牧起兵伐後秦西秦錄

十三年乞伏乾歸太初三年十一月隴西太守越質詰歸據平

狄道州志

卷十五紀事

十

襄叛自稱建國將軍右賢王西秦錄

十七年乞伏乾歸太初七年冬十月秦符崇爲乾歸所逐奔隴

西王楊定定率步騎四萬與崇共歸攻乾歸冠軍翟瑄奮劍

止之軻彈率騎往赴益州詰歸亦勒兵繼進定遂大敗斬定

及崇首虜萬七千級于是盡有隴西巴西之地西秦錄

乞伏乾歸太初十年二月按後涼錄呂光龍飛二年二月涼王呂光軍于長最

遣子纂帥步騎三萬攻金城乾歸率衆二萬救之未至纂等

拔金城光別將梁恭等以甲卒萬餘出陽武下峽與秦州刺

史没奕干攻其東以爲犄角之勢呂延按後涼錄呂光弟以枹罕之

衆攻陷臨洮武始河關乾歸泣謂諸將曰今事勢窮蹙逃命

無所死中求生正在今日涼軍雖四面而至然相去遼遠山河既阻力不周接敗其一軍衆軍自退乃縱反間給延稱秦王乾歸衆潰東奔成紀延信之引騎輕進遂大敗之斬延于

陣西秦錄

義熙六年秋七月西秦攻秦洛陽隴西諸郡皆克之通鑑

九年乞伏熾磐永康二年三月遣鎮東將軍曇達與平東將軍王松壽率騎一萬東討休官權小郎呂破胡於白石川大破之進據白石城降其衆萬餘人顯親公休官權小成呂奴迦等二萬餘戶叛據白坑負固不服曇達進攻克之斬小成奴迦及首級四千七百隴右休官悉降西秦錄

狄道州志

卷十五

紀事

十一

文帝元嘉三年熾磐建宏八年春正月山羗率衆叛二月熾磐遣左丞相曇達招慰武始諸羗征南將軍吉毘招慰洮陽諸羗羗人執曇達送夏吉毘爲羗所擊奔還士馬死傷者什有

六七西秦錄

北魏

武帝始光元年詔封勅文率步騎七千征吐谷渾慕利延兄子拾歸於抱罕衆少不能制詔遣安遠將軍廣川公乙烏頭等二軍與勅文會隴右軍次武始拾歸夜遁勅文引軍入抱罕虜拾歸妻子及其民戶分徙千家於上邽魏書封勅文傳

神嘉三年十有一月庚子帝幸紉城安慰初附赦秦雍之民賜

復七年赫連定隴西守及將士數千人來降魏書太武帝本紀

隋

文帝開皇十六年党項羌寇會州党項羌者三苗之後也共種

有宕昌白狼皆自稱獼猴種東接臨洮西平西拒葉護南北

數千里處山谷間每姓別為部落詔發隴西兵以討之大破

其衆相率請降隋書党項羌傳

煬帝大業五年夏四月己亥大獵于隴西乙巳次狄道党項羌

來貢物六月隴右諸郡給復一年行經之所給復二年隋書煬帝紀

本紀

十三年夏四月癸未金城校尉薛舉率衆反自稱西秦霸王建

狄道州志

卷十五紀事

十二

元泰興攻陷隴右諸郡北史煬帝本紀

唐

太宗貞觀九年春正月党項羌叛三月乙酉高甌生及羌人戰

敗之五月壬子李靖及吐谷渾戰敗之唐書太宗本紀

高宗上元元年吐蕃盜邊劉審禮戰歿婁師德奉使收敗亡於

洮河唐書婁師德傳

元宗開元二年八月吐蕃盜邊薛納為隴右防禦大使十月甲

子及吐蕃戰於武階敗之又戰虜大敗衆奔突不能去相枕

藉洮水為不流唐書吐蕃傳

以吐蕃犯邊無閑歲于是郭知運王君蒙相繼節度隴右河

西以扞之吐番遣宗俄因子到洮水祭戰死士且請和使者

至臨洮詔不內唐書吐番傳

開元中吐番攻白草安人軍詔臨朔方分援虜絕臨洮道白

水軍使高東拒守虜引去唐書吐番傳

十三年春正月壬子葬朔方隴右河西陣亡者唐書元宗本紀

十六年秋七月乙巳隴右節度使張志亮等克吐番大莫門城

八月辛卯及吐番戰於祁連城敗之唐書元宗本紀

天寶八年六月乙卯隴右節度使哥舒翰及吐番戰石堡城敗

之唐書元宗本紀

寶應元年吐番陷臨洮取秦成渭等州三年入大震關取蘭河

狄道州志

卷十五 紀事

十三

鄯洮等州於是隴右地盡亡唐書吐蕃傳

代宗廣德元年秋七月吐番陷隴右諸州唐書代宗本紀

永泰十三年約唐地涇州右盡彈箏峽隴州右極清水鳳州西

盡同谷劔南盡西山大度水吐番守鎮蘭渭原會西臨洮東

成州抵劔南西磨步諸蠻大度水之西南盡大河北自新泉

軍抵大磧南極賀蘭橐它嶺其間為間田二國所棄戍地唐書

吐番傳

宋

神宗熙寧元年西番朮征以河州來附西番俞龍琦率其衆內

附王韶上復河湟策初韶為建昌軍司理詣闕上平戎三策

以爲欲平西夏當復河湟今古渭之西熙河蘭鄯皆漢隴西等郡吐番唃斯囉一族國其間宜并有之以絕夏人右臂帝異其言王安石以爲奇謀乃以韶管幹秦鳳經略司機宜文

字韶遂行邊

舊府志

四年議取河湟置洮河安撫司王韶主之

全上

五年王韶大破羌人遂城武勝以爲鎮洮軍冬河州首領瞎藥來降以爲內殿崇班賜名包納

全上

王中正神宗時命經度熙河言可取狀遂從王韶入治城壁

守具

宋史李憲傳

六年冬十月辛巳以復熙河洮岷疊宕等州御紫宸殿受群臣

狄道州志

卷十五

紀事

十四

賀解所服玉帶賜王安石

宋史神宗本紀

七年甲寅王韶自熙州入朝景思立知河州事與吐番別將戰

於他踏北城敗死术征寇岷州刺史高遵裕擊走之

舊府志

趙思忠即瞎氈之子术征也青唐族酋迎居洮州欲立以復

洮岷疊宕武勝軍諸羌嘉祐中河州刺史王韶遣僧智圓往

說之啖以厚利因隨以兵前後殺其老弱焚族帳得心腹酋

領又擒其妻子皆不殺遂以熙寧七年四月舉洮河二州來

降賜以姓名使封其母妻弟董合賜名繼中補六宅副使結

吳延征賜名濟忠瞎吳吒曰紹忠巴氈角曰醇忠巴氈休曰

存忠長子邦辟勿丁呬曰徒義次盖呬曰秉義皆超拜官以

思忠爲秦州鈐轄不蒞事而乞主熙河羌部經畧司以爲不可詔以二州給地五十頃後遷河州防禦使

宋史本傳

西番旣衰其苗裔曰董氈其子曰巴氈角始附宋賜姓趙改

名順忠子永吉永吉子世昌皆受宋官爲左大夫遙領萊州

防禦使襲巴羊族長朝廷定陝西世昌換忠翊校尉旣而鬼

蘆族長京臧殺世昌朝廷遣兵執京臧斬之臨洮市以世昌

子鐵哥爲巴羊族都管

金史移刺成傳

九年詔宦者李憲節制熙河等諸軍時董氈將鬼章聚兵洮岷脇新附羌多叛歸之帝遣內押班李憲乘驛往熙河等措置

邊防事詔諸將皆受節制

通鑑

狄道州志

卷十五

紀事

十五

元豐二年熙河路制置邊防財用司李憲擅權本路商貨令漕

臣蔣之奇劾其罪

宋史食貨志

六年二月夏人數十萬分道入寇蘭州中丞劉摯言熙河經畧

使李憲貪功生事一出欺罔避興靈會師之欺頓兵以城蘭

州遺患至今詔貶憲爲熙河安撫經畧都總管

通鑑

章築建州浦城人哲宗問邊事稱旨命知渭州奏城胡蘆河

川據形勝以偪夏乃以三月合熙河秦鳳環慶之師築二城

於石門峽江口好水河之陰二旬有二日成賜名平夏城靈

平砦方輿役時夏以衆來撓築迎擊破之於是環慶鄜延河

東熙河皆相繼拓境築城夏師大舉圍平夏攻旬日度弗克

遁去甘肅通志

盧秉元祐初知渭州夏酋仁多嵬丁舉國入寇犯熙河定西城秉率兵駐靜邊砦據夏人來路明日縱擊之皆潰嵬丁敗

馬陝西通志

折可適雲中人章凖合三道兵築好水川命總管王文振統之而可適將軍為副熙州兵千人失道盡死凖下可適吏哲宗從輕止削十三官而罷凖請留以責效嵬名阿理昧勒都連皆夏人桀黠用事者詔可適密圖之會二酋以畜牧為名會境上可適謀知夜襲之併俘族屬三千人遂取天都山宋史

新編

狄道州志

卷十五 紀事

十六

徽宗政和五年春正月童貫遣熙河經畧使劉法將步騎十五萬出湟州秦鳳經畧使劉仲武將兵五萬出會州貫以中軍駐蘭州為西路聲援仲武至清水河築城屯守而還法與夏右廂軍戰于古骨龍大敗之斬首三千餘通鑑

七年三月詔熙河鄯湟自開拓以來疆土雖廣而地利悉歸屬羌官兵吏祿仰給縣官不可為後計仰本路帥臣相度以錢糧茶綵或以羌人所嗜之物與之貿易田土既多即招置弓箭手入耕出戰以固邊圉宋史兵志

高宗建炎二年二月金婁室既陷永興鼓行而西秦州帥臣李積降金人勢益張引兵犯熙河經畧使張深遣劉維輔以精

騎二千人禦之夜趨新店金人恃勝不慮黎明軍進維輔舞
稍刺其帥黑鋒洞胸墮馬死金人爲氣奪見舊府志

四年十二月金幹星朶取熙河上全

紹興元年金烏珠取鞏洮臯蘭積石西甯等州于是涇原熙寧

二路皆爲金有上全

二年十二月熙河蘭廓經畧使關師古舉兵復熙鞏通鑑

四年夏四月關師古遣兵拔金寨數十金人大衄至是慕洧與

金人合攻之師古戰不勝脫身降金通鑑

三十一年吳璘使姚仲復河原會熙州永安鎮戎軍舊府志

金

狄道州志

卷十五 紀事

十七

太宗天會二年畫陝西分界秦鳳路通懷堡至古會州自此直

距黃河依見今流行分熙河路金史西夏傳

四年睿宗駐兵熙州分遣諸將畧地撻懶以軍五百入六盤山

十六寨降其官八十餘民戶四千獲馬二千匹金史本傳

五年睿宗進兵降甘泉等三堡取保川城破宋熙河路副總管

軍三萬獲馬千餘拔安西二寨熙州降金史本紀

撒離喝睿宗時從平陝西狗自渭以西降德順軍進平西河

降甘泉等二堡遂取保川城金史本傳

八年十二月乙酉宗弼從宗輔定陝西敗張俊軍於富平遂與

阿盧補招降熙河涇原兩路金史本傳

赤蓋暉師至熙河獲熙河路都總管劉維輔以獻金史本傳

十三年蒲察胡蓋擊關師古於臨洮授德順州刺史金史本傳

天眷三年烏延蒲离黑速頻路哲特合喜定秦隴蒲离黑統完

顏習尼列顏蓋門都兵救德順州金史本傳

熙宗皇統二年二月賑熙河路金史本傳

世宗太定四年宋人破洮州鐵哥弟結什角與其母走入喬家族避之喬家族首領播逋與鄰族木波隴逋龐拜丙離四族耆老大僧等立結什角為木波四族長號曰王子結什角念朝廷為其父報讎欲棄四族歸朝四族不許成至臨洮使人招結什角乃率四族來附金史移刺成傳

狄道州志

卷十五 紀事

六年夏人殺結什角九年乃於熙秦迫近宋夏衝要量添戍兵及問喬家等族民戶願以結什角侄趙師古為首領於是詔師古為木波喬家丙離隴逋龐拜四族都鈐轄加宣武將軍

金史移刺成傳

章宗承安六年九月臨洮番部遵甯獻芻粟戰馬以助軍冬十月臨洮路兵馬都總管石抹仲溫以隴右步騎五千出鹽川

金史章宗本紀

泰和六年詔安慰陝西畧曰京兆鳳翔臨洮三路應被宋兵逼脅背國從偽没落外境若能自歸者官吏依舊勾當百姓各

令復業元拋土地依數給付金史完顏綱傳

宣宗貞祐三年八月乙卯諭陝西堅守延安臨洮德順等處要

害金史本紀

九月夏人復攻第五將城萬戶楊再興擊走之金史西夏傳

冬十月攻保安既而深入臨洮總管陀滿胡土門不能禦陝

西宣撫副史完顏胡朱來救臨洮大敗於渭源堡城破胡朱

來被執西夏傳

十一月丙子知臨洮府陀滿胡土門破夏人八萬於城下金史

宣宗本紀

四年五月己巳來遠鎮獲夏諜者陳岳等知夏人將圖臨洮鞏

州闕長安命陝西行省嚴為之備金史宣宗本紀

狄道州志

卷十五紀事

十九

興定二年四月宋人侵臨洮同知臨洮府事赤盞合喜擊走之

金史本傳

四年朝廷以知臨洮府事承裔為元帥左都監行元帥府於鳳

翔端奏隴外十州界宋夏之間與諸番雜處先於鞏州置元

帥府以鎮之金史僕散端傳

五年議取會州御前經歷官把胡魯上言臨洮路新遭劫掠瘡

痍未復所須芻糧決不可辦雖復取之慶陽等州亦恐未能

無闕正宜護民耕稼俟敵意怠然後取之詔從之金史本傳

內族白撒累官知臨洮府事兼本路兵馬都總管興定四年

上言宋境山州宕昌東上拶一帶番族昔嘗歸附分處德順

鎮戎之間其後相繼亡去近聞復有歸心然不招之亦無山自至已命遣人招之請預定賞格以待之上是其言五年五月白撒言近詔臣遣官諭諸番族以討西夏臣卽令臨路總管女奚烈古里間計約喬家丙令族首領以諭餘族又別遣權左右司都事趙梅委差官遙授合河縣尉劉貞同往撫諭未幾梅貞報奚哥城等處諸族與先降族共願助兵七萬八千餘人本國番族願助兵九千若更以官軍繼爲聲援勝夏必矣臣已令古里間將鞏州兵三萬宜更擇勇畧之臣副之梅貞等旣悉事勢當假以軍前之職番僧納林心波亦招誘有功乞遷官授職以獎勵之上皆從其請

金史本傳

狄道州志

卷十五

紀事

二十

元光元年二月夏兵分寇龕谷諸城白撒馳至臨洮遣總管女奚烈古里間積石州刺史徒單牙武各攝帥職率兵西入遇夏兵千餘於踏南寺擊走之

金史白撒傳

哀宗正大四年五月丁丑元兵平臨洮府總管陀滿胡土門死

之

金史哀宗本紀

元

按竺邇雍古氏其先居雲中塞上甲戌太祖西征以功爲千

戶丁亥從破臨洮攻德順斬首百餘級

元史本傳

速不台蒙古兀良合人攻下德順鎮戍蘭會臨河諸州

元史本傳

雪不台蒙古部兀良罕氏太祖二十一年取德順鎮戍蘭會

洮等州獻牧馬三千匹

元史本傳

拜延河西人父火奪都太宗朝從征西州忽都叛於臨洮世

祖命火奪都等以蒙古漢軍從大軍征討之

元史本傳

也罕的斤匣刺魯人祖匣答兒從睿宗攻臨洮死焉

元史本傳

順帝至元二十六年陝西行省平章趙脫兒守臨洮是年太尉

李思齊來據

雍大紀

明

太祖洪武二年徐達以征虜大將軍右丞相北代諸將議欲先取慶陽後攻臨洮達曰臨洮北界河湟西控羌戎得之其人民足以備戰鬪地產足以佐軍儲今以大軍蹙之思齊不走

狄道州志

卷十五 紀事

二十一

卽束手縛矣遣右副將軍馮勝逼臨洮李思齊果降

明史本傳

四年議征沙漠以宋國公馮勝爲征西將軍傅友德陳德爲副

總兵道出臨洮攻甘肅

舊府志

八年夏四月辛卯帝幸中都丁巳至中都免臨洮等州被災田

租

明史本紀

二十五年帝以諸衛將士有擅索番人馬者遣官齎銅信符勅諭往賜臨洮鞏昌等處諸番族諭之曰往者朝廷有所需必酬以茶貨未許私徵近聞邊將無狀多假朝命擾害俾爾等不獲甯居今特製金銅信符頒給遇有徵發必比對相符始行否則械至京罪之至是需求遂絕

明史西番傳

成祖永樂七年八月臨洮衛趙安奉勅選取本衛士軍士民人等征迤北於亥冥河等處

趙氏家乘

二十年費瓏充總兵官鎮甘肅瓏以肅州兵多糧少脫有調發卒難措置請以臨鞏稅糧付近邊軍丁轉運從之

明史本傳

二十年以趙安管領士軍士民人等隨征迤北收趕馬匹牛羊

趙氏家乘

宣宗宣德五年六月勅諭都督趙安前者差去烏思藏使臣回還往往爲曲先衛指揮散卽思邀截搶劫爾可於臨洮衛選調人馬七百員名到甘州取齊聽太監王安王瑾節制相機

撫勅

趙氏家乘

狄道州志

卷十五

紀事

二十二

英宗正統元年八月十一日勅諭右副總兵都督同知趙安今命爾於洮岷等八衛官軍內選揀精銳能戰者五千員名爾就統領於甘肅涼州等處緣邊巡哨遇有達賤相機勦殺所領官軍悉聽節制共成厥功以副朕委任之意

趙氏家乘

五年勅陝西鎮守都督鄭銘都御史陳鎰曰得奏言河州番民傾占等先因避罪逃居結河里招集徒黨占耕土田不注籍納賦又藏匿逃亡剽劫行旅欲發兵討之朕念番性頑梗且所犯在赦前若遽加師旅恐累及無辜宜使人撫諭令散遣徒黨還所掠牛羊兵卽勿進否則加兵未晚爾等其審之番

人果輸服

明史西番傳

天順八年拜趙輔將軍陝西延綏甯夏三鎮兵皆聽節制輔至榆林寇已深入大掠輔不能制與王越疏請罷兵命給事中郭鏗往勘還言寇於六月入平涼鞏昌臨洮殺掠人畜迨七月而縱橫慶陽境內輔與越至榆林不進宜治其弛兵玩寇罪帝不納

明史趙輔傳

天順末虜寇臨洮鞏昌馬文升敗之

明史本傳

武宗正德十年套夷深入掠臨洮等處總制都御史鄧章調官

軍不能禦

舊府志

十三年套夷復潛入臨洮

全上

世宗嘉靖八年洮岷番侵臨洮總制尙書王瓊遣鎮守都督劉

狄道州志

卷十五

紀事

二十三

文等進兵擊破之斬首三百餘級

明史西番傳

洮岷諸番數犯臨洮鞏昌內地騷動樞臣李承勳言番爲海寇所侵日益內徙倘二寇交通何以善後昔趙充國不戰而服羗段熲殺羗百萬而內地虛耗兩者相去遠矣乞廣先帝之明專充國之任制置方畧番聽王瓊便宜從事

明史西番傳

神宗萬歷三年西羗劄着他等人犯臨洮殺掠人民固鎮總兵

孫國臣統兵分路由舊洮州進勦大滅之推官劉希稷監軍

斬首百四十餘級獲兵器輜重三千有奇

舊府志

四年遣兵部侍郎吳道有大閱邊務至臨洮時火落赤等酋住

牧莽捏二川窺伺內地

全上

十八年永邵卜部衆有闌入西甯者副總兵李奎被衆射死時
丙鬼子真相移駐莽刺川火落赤移駐捏工川七月復深入
大掠河州臨洮渭源總兵官劉承嗣與遊擊孟孝臣各將一
軍禦之皆敗績遊擊李芳等死焉西郵大震事聞命尙書鄭
洛出經畧自是歸附者不絕明史本傳
董一元宣府前衛人鄭洛經畧洮河命一元練兵西甯火落
赤入犯一元擊之西川多所斬獲明史本傳
七月十三日賊酋火落赤由河境入犯狄道臨鞏兵備郭宗
賢固鎮總兵劉承嗣督蘭州遊擊孟孝臣兵大戰於和政驛
破之斬首十餘級火酋次子把罕免長婿拜言他卜囊俱中

狄道州志

卷十五 紀事

二十四

炮死

舊府志

十五日四郊皆賊孝臣自改河領兵屯南州賊勢稍解全上

十八日岳維華分遣民兵擊賊斬首五十級舊府志

二十七日賊屯朱家山總兵劉承嗣督叅將鄧鳳遊擊孟孝

臣郭有光等提領靖固延甯等四處兵馬與賊大戰時秋雨

霽霖賊乘勢大舉承嗣敗績指揮李如玉千戶魏承勳李國

瑞把總何天衢等俱死賊追承嗣甚急孝臣力救得免時火

酋甚狂兵無紀律我兵堵勦逐至郭麻灘遂失勢覓去路不

得至八月初二日始盡出境奪獲原虜男女百六十餘名牛

羊器物萬計全上

冬十月戊寅賑臨洮被兵軍民

全上

萬國欽新建人萬歷十一年進士婺源知縣十八年夏火落赤諸部頻犯臨洮鞏昌七月帝召見大學士申時行等於皇極門咨以方畧言邊備廢弛督撫乏調度欲大有所振飭時行以款貢足恃爲言國欽抗疏劾曰陛下以西事孔棘特召輔臣議戰守而輔臣於召對時乃飾詞欺罔陛下怒賊侵軼則以爲攻抄熟番臨鞏果番地乎陛下責督撫失機則以爲咎在武臣封疆僨事督撫果無與乎陛下言款貢難恃則云通貢二十年活生靈百萬西甯之敗肅州之掠獨非生靈乎是陛下意在戰時行必不欲戰陛下意在絕和時行必欲與

狄道州志

卷十五

紀事

二十五

和蓋由九邊將帥歲餽金錢漫無成畫寇已殘城堡殺吏民猶謂計得三邊總督梅友松意專媚敵前奏順義謝恩西去矣何又圍我臨鞏後疏盛誇戰績矣何景古城全軍皆覆甘肅巡撫李廷議延賊入關不聞奏報反代請贖罪計馬牛布帛不及三十金而殺掠何止萬計欲仍通市臣不知於國法何如也此三人皆時行私黨故敢朋奸誤國乃爾因列上時行納賄數事帝謂其淆亂國事誣污大臣謫劔州判官

明史本傳

尤繼先榆林衛人神宗十八年火落赤真相犯洮河副總兵李聯芳等戰死詔繼先進署都督僉事充總兵官代劉承嗣鎮守固原寇據莽刺湟工二川日蠶食番族且擾西甯聞官

軍大集卜失兔又敗於水泉乃乘冰堅渡黃河北走留其黨可卜列宗塔兒等五百餘人牧莽刺川南山南山即石門大山口走烏思藏門戶也屬番來告繼先乃令番以八百人前導與故總兵劉承嗣遊擊原進學吳顯等疾馳七百里直抵南山奮擊大破之斬首百五十有奇生獲十二人

明史達雲附傳

張臣榆林衛人神宗初為陝西總兵官十八年春移鎮甘肅火落赤犯洮河卜失兔將往助之其母泣阻不從遂攜妻女行由永昌宋家莊穴墻入臣逆戰水泉三道溝手格殺數人奪其坐纛卜失兔及其黨炒胡兒並中流矢走臣亦被創將士斬級以百數生獲其愛女及牛馬羊萬八百有奇卜失兔

狄道州志

卷十五 紀事

仰天大慟曰傷哉我女悔不用母言以至此也自是不敢歸

巢 明史本傳

二十四年三月火落赤犯洮河總兵官劉綎破走之

明史神宗本傳

二十三年增設臨洮總兵官以綎任之明年諸酋復掠番族

將窺內地綎部將周國柱禦之莽刺川又大破之

明史劉綎傳

二十八年青海寇糾番族寇洮岷總兵蕭如薰及臨洮總兵

孫仁禦之擒斬三百四十有奇撫叛番五千人獲駝馬甲仗

無算 明史本傳

熹宗天啟六年臨營兵高印以索餉作亂兵備副使熊師且斬

其渠首餘黨悉平 舊府志

莊烈帝崇正三年陝西羣盜起五鎮總兵並以勤王行總督楊

鶴請令杜文煥署延鎮事兼督固原軍數敗賊明史杜桐附傳

七年臨營兵蔡虎作亂倡眾搶掠焚毀郡中廬舍幾陷巡按李

嵩尋以同黨相殺遂降舊府志

九年十二月李自成兵過臨洮總兵曹變蛟追勦出境全上

十六年李自成兵至臨洮大掠居民全上

國朝

世祖順治五年二月甘州徇民米刺印丁國棟等反陷甘肅破涼

州莊浪蘭岷臨洮徇黨應之殺城守遊擊及生員李文煒李

毓秀王興孫三傑等焚掠二十餘日總督孟喬芳疾馳救援

狄道州志

卷十五

紀事

二十七

遣標營遊擊張勇恢復鞏昌臨洮等處斬僞王士倫太等生

擒賊首丁國棟黑承印斬首二萬有奇擢甘州總兵勇洋縣

人見舊府志及朱彝尊撰孟公神道碑

五月初旬臨洮徇闖塌天等數百據城官兵攻圍兩月始降

斬逆首王道宏餘黨縱歸舊府志

七月闖塌天自受招後潛居高山復集餘黨劫掠叅將曹希

冬令材官雷明宇偵之得其實於夜偃旗息鼓遂獲之梟其

首脅從餘黨胥平舊府志

聖祖康熙十三年正月吳逆叛僞總兵趙時申陷臨洮舊府志

二月甘肅提督張勇西甯總兵王進寶提兵討之全上

時陳可聞我兵圍蘭州回據臨洮郡城約三千餘衆率疎縱無律而金縣會甯安定三邑各有逆賊竊踞聯絡守備王萬祥堅稱蘭州係緊要處所彼必死守一時難以急攻不若先取臨洮削其手足則彼坐困孤城不戰而自屈矣進寶然之即親督兵六百名帶萬祥前進至馬蓮灘命遊擊王朝海爲頭敵攻東門萬祥爲次攻魁星路路遇臨洮百姓只許其來不許其去并密捉沿塘賊兵以杜走漏四更到城外教場四無人聲復前行下馬過壕見城垣有微科處萬祥令家人閤潤空身先上至垛口挂下繩子次有一鎗手攀繩而上第三即萬祥身穿盔甲佩撒帶挂鎗一桿後陞曲雄總兵劉廷傑

亦尾之並上賊兵知覺砲火箭鎗盛發不得進前只在排墻內死堵時天色微明陸續上城者不過五六十人萬祥曰此處進退無門倘戰敗亦難下城總是一死不如拚命一戰勝負未可定也衆以爲然遂推開排墻手斫二賊衆兵繼進賊俱下城奔竄我兵上城者又有百十餘人城內賊騎意欲登城迎敵萬祥喝令衆兵各拾石亂打死傷無數賊衆不支擁出北門我兵追殺至西北角王朝海亦攻開東門賊兵逃竄僞總兵陳可領賊兵三千被殺過半擒與降者約五百餘人辰刻將軍進城當即安民並分設文武汛守

王萬祥西
征紀畧

李日榮字君寵中衛人幼從軍康熙十五年王輔臣之變洮

蘭俱陷日榮從奮威將軍王進寶夜渡黃河恢復臨洮加右

都督甘肅通志

狄道州志

卷十五紀事

二十九